

**Keluarkan salib: Permintaan bukan arahan**  
**Malaysiakini.com**  
**January 7, 2011**

Pegawai khas kepada perdana menteri, Datuk Hardev Kaur menafikan beliau adalah pegawai yang memberikan arahan supaya elemen keagamaan Kristian, termasuk salib atau lambangnya dibuang daripada satu majlis sambutan Krismas yang dihadiri Datuk Seri Najib Razak pada 25 Disember lalu.

“Tidak ada arahan juga supaya lagu-lagu (carol) tidak dinyanyikan pada majlis itu.

“Oleh kerana atur cara perdana menteri adalah ketat pada hari itu, saya hanya mencadangkan lagu-lagu (carol) dinyanyikan untuk menghiburkan pengunjung sementara menanti kehadiran perdana menteri. Saya tidak pernah mengarahkan carol tidak boleh dinyanyikan ataupun melarang bacaan petikan Injil dibacakan pada majlis berkenaan,” kata Hardev dalam satu kenyataan media.

Menurut beliau, bagi mengelakkan salah faham, beliau memang ada mencadangkan supaya rostrum di mana perdana menteri akan menyampaikan ucapannya tidak mempunyai sebarang lambang keagamaan.

“Saya juga jelaskan bahawa, ia satu permintaan dan bukannya arahan.

“Malah tidak ada salib ataupun sebarang simbol keagamaan di tempat majlis jamuan teh itu diadakan di perkarangan tempat letak kereta kediaman ketua biskop Kuala Lumpur,” katanya.

Menurut Hardev lagi, semua permintaan itu dilakukan dengan niat baik atas budi bicaranya dan bukan arahan daripada perdana menteri.

Sehubungan itu, katanya, jika permintaan itu telah disalah-tafsirkan, beliau memohon maaf.